

– Այդ տունը լիքն էր երեխաներով... լիքն էր մայրերով ու հայրերով... հիմա տեսնում եք, մնացել է մի հիւանդ միայն եւ այս փոքրիկը, նա ցոյց տոնեց կիսամերկ տղային, որ այժմ խլրտում էր մօր բարձի մօտ: – Ամենքը ոչնչացան... ամենքը կորան... նրա համար, որ աղքատութիւնը մահուան հետ միասին է մտնում մարդու շեմքից...

Երեխան այժմ հեռացաւ մօր անկողնից, սողալով մօտեցաւ Ասլանին, բռնեց կօշիկներից, կանգնեց եւ իր փոքրիկ ձեռիկներով սկսեց խաղալ նրա ժամացոյցի շղթայի հետ: Ես միշտ երեւակայում էի Ասլանի մէջ քարտ սիրտ, բայց նա չկարողացաւ դիմանալ, երբ երեխան իր սեւ փայլուն աչիկներով նայելով նրա երեսին, ժպտաց եւ թօթովեց մի քանի խօսքեր: Դժբախտութեան զաւակը խօսում էր... խօսում էր անելի ազդու, քան ամէն բողոք... եւ, կարծես, իր անհասանելի թօթովանքով ասում լինէր. «ինչո՞վ եմ ես մեղաւոր, որ ինձ աշխարհ բերեցին... միթե՞ միայն տանջուելու համար»...

Ասլանը համբուրեց երեխային, վերկացաւ եւ, ձգելով հիւանդի բարձի մօտ ոսկիները, իսկոյն դուրս եկաւ թախծալի բնակարանից:

– «Աղքատութիւնը մահուան հետ միասին է մտնում մարդու շեմքից»... – ճանապարհին կրկնեց նա պառաւի իմաստալի խօսքերը: – Դա մի անհերքելի ճշմարտութիւն է: Որտեղ տիրում է թշուառութիւնը, այնտեղ անելի մեծ թող զոհեր է տանում մահացութիւնը: Ոչ մի ժողովրդի մէջ չէ կարելի յուսալ կանոնաւոր աճելութիւն, երբ որ նրա տնտեսական դրութիւնը օրինաւոր պայմանների մէջ չէ դրոած: Այդտեղից հասկանալի է, թէ ինչո՞ւ մեր ժողովուրդը օրըստօրէ սպառում է: Այդ սպառմանը անելի զարկ է տալիս գաղթականութիւնը: Տղամարդը, իր կեանքի ամենաթարմ տարիները պանդխտութեան մէջ մաշելով, զրկւում է գերդաստանի հայր դառնալուց, որդիք եւ սերունդ առաջ բերելուց: Իսկ ինչ զաւակներ էլ որ թողել է տանը, աղքատութեան մէջ մեռնում են: Ահա, մեր աչքով տեսանք մի հոյակապ ընտանիք, որ հանգչելու մօտ է: Բայց քանի հազար այսպիսի ընտանիքներ կան այդ քաղաքում: Այդ գեղեցիկ, ծառազարդ տներում, – նա ձեռքը մեկնեց դէպի Այգեստանի տները, – բնակւում են երկու ծայրայեղութիւններ. ճոխութիւն, շռայլութիւն եւ վերին աստիճանի աղքատութիւն: Շռայլում են հարստահարիչ մեծատունները, իսկ հեծում են պարտքերի տակ ճշուած թշուառները...

Այդպէս խօսելով գնում էինք մենք, երբ ճանապարհին հանդիպեց մեզ վարպետ Փանոսը:

– Այն հիւանդը կապրի՞, – հարցրեց նա, մօտենալով Ասլանին: